

खबरां श्रुति खजूरिया कोला

- भारत ते कनाडा नै दपक्खी सरबंधें गी बढावा देने आस्तै महत्वपूर्ण खनिज, नवीकरणीय उर्जा ते सांस्कृतिक सहयोग पर समझौते दा आदान-प्रदान कीता। प्रधानमंत्री नरेंद्र मोदी ते कनाडा दे प्रधानमंत्री मार्क कार्नी बश्कार प्रतिनिधिमंडल सतह दी गल्लबात होई।
- प्रधानमंत्री नरेंद्र मोदी होरें पच्छिम एशिया च संकट दा संवाद ते कूटनीति कन्नै हल कडुने दा आह्वान कीता।
- ईरान पर इजराएल-अमरीका दी सांझी सेनाएं दे मिसाइल हमले करी पच्छिम एशिया च संघर्ष तेज होई गेआ ऐ। ईरान दा अमरीका कन्नै गल्लबात करने थमां इंकार।
- ब्रिटेन नै ईरानी मिसाइल थाहें पर हमले करने आस्तै अपने ठकानें दे इस्तेमाल दी इजाजत दिती।
- एयर इंडिया दी संयुक्त अरब अमीरात, साउदी अरब, इजराएल ते कतर सोयां औने जाने आहली सारी डोआरियां अज्ज बी रद्द।
- केंद्र सरकार नै पच्छिम एशिया च तनाव बढने करी राज्यें गी परामर्श जारी करिए एहतियात बरतने लेई आखेआ।
- ते युद्ध करी तेल आपूर्ति च बाधा दी शेंका करी वैश्विक कच्चे तेल दी कीमतें च 7 फीसद थमां मते दा बाद्दा दर्ज कीता गेआ, दुनिया भरै दे शेयर बजारें च भारी गिरावट आई।

<><><><><><>

पच्छिम एशिया दी मौजूदा स्थिति साहडे आस्तै डूंगी चिंता दा विशे ऐ। भारत डायलाग ते डिप्लोमेसी दे माध्यम कन्नै सारे मसले दे हल दा समर्थन करदा ऐ। इस क्षेत्र च मौजूदा सारे भारती नागरिकें दी सुरक्षा आस्तै अस सारे मुखें कन्नै मिलियै कम्म करदे रौहगे। प्रधानमंत्री होरें आखेआ जे आतंकवाद, उग्रवाद ते कट्टरपंथ नां छड़ा दौनें मुखें आस्तै सगुआं पूरी मानवता लेई चुनौती ऐ।

<><><><><><>

JK-Protests

ईरान दे सबनें शा बड्डे लीडर अयातउल्लाह अली खमनेई दी मौत दे बाद होए दे प्रदर्शनें दे चलदे कश्मीर दे बक्ख-बक्ख हिस्सें च रमानदारी बनाई रक्खने लेई एहतियात दे तौरा पर किश बंदिशां लाइयां गेदियां ना। सुरक्षा बवस्था गी हाई- अलर्ट उप्पर रक्खेया गेआ ऐ- जिसलै जे बजार अज्ज बंद हे। श्रीनगर दे लाल चौक इलाके गी एहतियात दे तौरा पर सील करी दिता गेदा ऐ। किश मकामी संस्थाएं भद्रवाह ते गंदोह च बी बंद हडताल दा आह्वान कीते दा ऐ। अधिकारियें दा आखना ऐ जे ए बंदिशां रमानदारी बनाई रक्खने ते कुसै माड़ी घटना कोला बचाव दे तौरा पर लाइयां गेदियां ना।

<><><><><><>

CM-Iran

मुखमंत्री उमर अब्दुल्ला होरें ईरान च पैदा होए दे खतरनाक हालात पर गैहरी चिंता प्रगट कीती ऐ। मुखमंत्री होरें सबनें समुदायें दे लोकें अगगे अपील कीती ऐ जे ओ शांति ते सदभाव बनाए रक्खन ते कुसै बी चाल्ली दी ऐसी कारवाई नैई करन जेहदे नै समाज च अशांति जां टेंशन पैदा होऐ। अपनी इक सोशल मीडिया पोस्ट च उमर अब्दुल्ला होरें आखेया ऐ जे जम्मू-कश्मीर सरकार भारत सरकार दे विदेश मंत्रालय दे नेडमें सम्पर्क च ऐ- तांजे ईरान च मजूद जम्मू-कश्मीर दे विद्यार्थियें ते होरनें नागरिकें दी सुरक्षा गी जकीना बनाया जाई सकै। उंनें आखेया जे हालात पर नेडमी तक्क रक्खी जा करदी ऐ।

<><><><><><>

MEA- Foreign Nationals

विदेशमंत्रालय नै भारत च रवा करदे ऐसे सबनें विदेशी नागरिकें लेई सलाह जारी कीती ऐ जे ओ जेकर अपना वीजा बधाना चाहंदे न- जा मते चिरै लेई इत्थै ठैहरना चाहंदे न- तां तौले अपने नेडे दे विदेशी क्षेत्रीय रजिस्ट्रेशन दफ्तर कन्नै सम्पर्क करन। एह सलाह अमरीका-इजरायल ते ईरान आसेआ कीते गेदे हमलें ते जवाबी कारवाइयें दे बाद पच्छिम एशिया च बदधी तनोतनी दे चलदे जारी कीती गई ऐ- जेहदे चलदे उस क्षेत्र च आओ-जाई पर असर पेया ऐ। भारत नै पच्छिम एशिया च अपने नागरिकें लेई बक्खरें तौरा पर यात्रा ते सुरक्षा-परामर्श जारी कीता ऐ। तेलअवीव च भारतीय दूतावास नै भारतीय नागरिकें गी बड़ी मती एहतियात बरतने- गैर जरूरी यात्रा करने कोला बचने- तैहत बंकरें ते आसरमें कश ठैहने ते आधिकारिक दिशा-निर्देशें दी पालमा करने लेई आखेआ ऐ। लोकें दी मदद लेई इमरजेंसी हैल्पलाईनां बी सक्रिय करी दितियां गेदियां ना। ईरान च भारती नागरिकें गी गैर जरूरी आओ-जाई कोला बचने दी सलाह दिती गई ऐ। संयुक्त अरब अमीरात- सऊदी अरब ते जार्डन सने खाड़ी मुल्खें च राजनयिक मिशनें बी भारतीयें गी मता सौहगा-सर्तक रौहने ते दूतावासें च रजिस्ट्रेशन कराने दा आह्वान कीता ऐ। विदेशमंत्री डाक्टर एस. जयशंकर होरें सऊदी अरब ते कुबैत दे विदेशमंत्रियें कन्नै क्षेत्र च स्थिरता गी लेइयै भारत दियें चिंताएं गी उजागर कीता ते मजूदा हालात पर चर्चा कीती। केन्द्र सरकार नै पच्छिम एशिया दे घटनाक्रम गी दिखदे होई हर मुमकन सहायता दी वचनबद्धता पक्की कीती ऐ।



West Asia Conflict

ईरान ते इस्राएल-अमरीका बश्कार बधदे मिसाइल ते ड्रोन हमलें करी पच्छिम एशिया च संघर्ष तेज होई गेआ ऐ। ईरान ते समर्थित संगठन मिलियै इस्राएल ते खाड़ी देशें पर मिसाइल हमले करा'रदे ना। उत्थे गै, इस्राएल ते अमरीका ने ईरान दे केई ठिकानें पर बमबारी कीती। ब्रिटेन, फ्रांस ते जर्मनी ने आखेआ ऐ जे ओह ईरान दे हमलें दा मुकाबला करने लेई अमरीका दे कन्नै ना। खाड़ी देशें दे इक समूह ने आखेआ ऐ जे उ'नेंगी ईरानी हमलें दा जोआब देने दा अधिकार ऐ। ओमान दे समुंदरी सुरक्षा केंद्र ने दस्सेआ ऐ जे मस्कट प्रांत दे समुंदरी कंडू कोला 52 मील दूर समुंदर च इक तेल टैंकर पर विस्फोटक

कन्नै भरोची दी किशती कन्नै हमला कीता गेआ। हमले च चालक दल दे इक सदस्य दी मौत होई गई। सुरक्षा केंद्र ने दस्सेआ जे चालक दल दे होरनें 21 सदस्ये गी सुरक्षित उत्थुआं कड्डी लैता गेआ ऐ। कतर दे रक्षा मंत्रालय ने घोषणा कीती ऐ जे देशे च ऊर्जा कन्नै सरबंधत थाहें पर दो मिसाइल हमले होए, जिंदे च कुसै दे घाऽल होने जां मारे जाने दी कोई खबर नेई ऐ। मंत्रालय ने आखेआ ऐ जे हमले च होए दे नुकसान दा आकलन कीता जा'रदा ऐ। ब्रिटेन दे समुंदरी बपार संचालन- यू.के.एम.टी.ओ दा आखना ऐ जे बहरीन बंदरगाह च इक जहाज पर दो मिसाइलें कन्नै हमला कीता गेआ ऐ। यू.के.एम.टी.ओ ने आखेआ ऐ जे मिसाइल हमलें करी जहाज पर अगग लग्गी गई। तोआई, फ्रांस दे बदेश मंत्री जीन-नोएल बैरोट होरें मध्य पूर्व संकट पर संयुक्त राष्ट्र च पैहले शा चर्चा कीते बिना ईरान पर हमले शुरू करने लेई इस्रराएल ते अमरीका दी निंदेआ कीती। उ'नें ईरान आसेआ कीते गेदे जवाबी हमलें दी बी निंदेआ कीती। उ'नें आखेआ जे ईरान गी एकडे हमलें गी रोकना होगा। तोआई, कुवैत दे रक्षा मंत्रालय ने आखेआ ऐ जे अमरीका दे केई जंगी जहाज हादसे दा शिकर होई गे न पर उ'दे चालक दल सुरक्षित ना। कुवैत दे रक्षा मंत्रालय दे प्रवक्ता, ने दस्सेआ जे अधिकारियें तुरत खोज ते बचाऽ अभियान शुरू कीता। तोआई, अमेज़ॅन ने आखेआ ऐ जे ईरान दे हमलें करी बहरीन ते संयुक्त अरब अमीरात च उं'दी क्लाउड यूनिट दे डेटा सेंटर बिजली ते कनेक्टिविटी दिएं समस्याएं दा सामना करा'रदे ना। कंपनी ने आखेआ ऐ जे संयुक्त अरब अमीरात च अमेज़ॅन क्लाउड यूनिट दे द'उं जोन दे डेटा सेंटर दे समूह च बिजली नेई ऐ। बधदी तनोतनी दे दरम्यान ईरान दे आला सुरक्षा अधिकारी अली लारीजानी होरें आखेआ ऐ जे उं'दा मुख अमरीका दे कन्नै गल्लबात नेई करगा। ईरान दे बदेश मंत्री अब्बास अराघची होरें हाल च गै होए दे अमरीकी व्हाई हमलें दी सख्त निंदेआ कीती ऐ। अराघची होरें इ'नें हमलें गी गैरकानूनी करार दित्ता ते आखेआ जे ईरान दी कार्रवाई आत्मरक्षा ही। अमरीकी राष्ट्रपति डॉनल्ड ट्रम्प होरें आखेआ ऐ जे अमरीका, कुवैत च मारे गेदे अपने त्रै सैनिकें दी मौत दा बदला लैगा। इक सोशल मीडिया पोस्ट च, श्री ट्रम्प होरें आखेआ ऐ जे ईरान दे 9 युद्धपोत डुब्बी गे न ते नौसेना दा मुख्यालय बी काफी नष्ट होई

गेआ ऐ। इसराएल दी वायु सेना ने दस्सेआ जे ईरान ने अज्ज इसराएल आहली बक्खी केई मिसाइलें दागियां ना। तोआई सऊदी अरब दी रास तानूरा तेल रिफाइनरी पर हमला होआ। सऊदी अरब ने आखेआ जे उन्ने रास तानूरा तेल रिफाइनरी गी निशाना बनाने आहले ड्रोन गी रोकेआ। सऊदी अरब दे सरकारी टेलीविजन दे मताबक, ड्रोन हमले दे बाद अधिकारियें दम्माम दे नेडे स्थित रास तनुरा रिफाइनरी गी अस्थायी रूप कन्नै बंद करी दित्ता ऐ। संयुक्त राष्ट्र दे परमाणु निगरानी निकाय च ईरान दे राजदूत रजा नजाफी होरें दससेआ जे कल अमेरिकी ते इजरायली फौजी अभियानें दे दरान नतान्ज़ च स्थित देशै दी विशाल परमाणु सुविधा पर हमला होआ।

<><><><><><>

Air- India Advisory

एयर इंडिया नै पच्छमी एशिया च मौजूदा स्थिति गी दिखदे होई यात्रा परामर्श जारी कीता ऐ। परामर्श च एयर लाइन नै आखेआ ऐ जे संयुक्त अरब अमीरात, साउदी अरब, इजराइल ते कतर थमां औने जाने आह्लियां सारियां डोआरियां स्थगित रौहडन। एहदे अलावा अज्ज यूरोप जाने आहली किश डोआरियां बी रह करी दित्तियां गेइयां ना। इन्दे च अमृतसर थमां बर्मिंघम, दिल्ली सोयां ज्यूरिख, दिल्ली थमां कोपेनहेगन ते बर्मिंघम सोयां दिल्ली जाने आह्लियां डोआरियां शामिल ना। परामर्श च दस्सेआ गेआ ऐ जे उत्तरी अमरीका ते यूरोप जाने आह्लियां होर सायिं डोआरियां पच्छमी एशिया च उपलब्ध ब्हाई खेत्तरें सोयां वैकल्पिक रस्तें दा इस्तेमाल करदे होई तय समें पर संचालित होडन।

<><><><><><>

Afghan def. Ministry

अफगानिस्तान दे रक्षा मंत्रालय नै घोशणा कीती ऐ जे औदी वायु सेना नै रावलपिंडी स्थित प्रमुख ब्हाई अड्डे गी निशाना बनांदे होई केई पाकिस्तानी सैन्य ठकानें पर ब्हाई हमले कीते ना। सोशल मीडिया पोस्ट च अफगानिस्तान दे रक्षा मंत्रालय नै आखेआ जे एह हमले रावलपिंडी स्थित नूर खान ब्हाई अड्डे, बलूचिस्तान दे क्वेटा च 12मीं डिविजन दे मुख्यालय ते खैबर पख्तूनख्वा दे मोहम्मद एजेसी

च स्थित खवाजाई शिविर सने प्रमुख पाकिस्तानी सैन्य ठकानें गी निशाना बनाइयै कीते गे हे।
मंत्रालय नै दावा कीता जे इनें हमलें दरान पाकिस्तान स्थित कई रणनीतिक कमान केंद्रें गी बी
नशाना बनाया गेआ ऐ।

<><><><><><>

Centre Cautinary

केंद्र नै इजराइल अमरीका आसेआ ईरान पर हमलें दे मद्देनजर भारत च संभावित हिंसा गी लेइयै
राज्यें गी चेतावनी जारी कीती गेई ऐ। सूत्रें मूजब गृह मंत्रालय नै सारे राज्यें ते केंद्र शासित प्रदेशें गी
चिट्ठी लिखियै भड़काउ भाशण देने आहले ईरान समर्थक कट्टरपंथी उपदेशकें गी पंछानने लेई आखेआ
ऐ। पत्र च कनून बवस्था बिगड़ने सोयां बचने आस्तै खुफिया जानकारी सांझा करने ते कार्रवाई गी
तेज करने दी जरूरता पर जोर दित्ता।

<><><><><><>

Crude Oil

पच्छिम एशिया च बढधी तनोतनी करी अज्ज दपैहरी वैश्विक कच्चे तेल दे भाएं च करीब नौ प्रतिशत दा
बाद्दा होआ ऐ। एहदे च होर्मुज जल-डमरू-मध्य च व्यवधान दी शेंका बदी गेई ऐ। होर्मुज कन्नै वैश्विक
तेल आपूर्ति दा करीब 20 प्रतिशत ते भारत दे कच्चे तेल आयात दा 40 प्रतिशत थमां बद्द हिस्सा
गुजरदा ऐ। ताजा जानकारी मुजब ब्रेंट क्रूड 9 अशारिया 4 प्रतिशत थमां बढियै 79 डॉलर ते 76 सेंट
प्रति बैरल पर ते डब्यूरत टी आई-क्रूड बी 8 अशारिया 8 प्रतिशत बढियै 72 डॉलर ते 89 सेंट प्रति
बैरल पर कारोबार करा'रदा हा।

<><><><><><>

Prez. Schemes

राष्ट्रपति द्रौपदी मुर्मू होंरें दिल्ली दी महिलाएं गी समर्पित 4 योजनाएं दी शुरूआत कीती। इन्दे च लखपति बिटिया योजना, सहेली पिंक स्मार्ट कार्ड, मेरी पूंजी मेरा अधिकार ते मुफ्त एलपीजी सिलेंडर योजना शामिल ऐ। इस मौके पर राष्ट्रपति होंरें इस गल्ला पर जोर दित्ता जे महिला समाज दा आधार ना। उनें आखेआ जे उंदा सम्मान ते सशक्तिकरण इक सभ्य राष्ट्र दी सञ्ची पंछान ऐ। राष्ट्रपति मुर्मू होंरें दस्सेआ जे केंद्र सरकार पी.एम उजवला योजना, बेटी बचाओ बेटी पढ़ाओ ते प्रधानमंत्री मातृ वंदना योजना जनेई परिवर्तनकारी पैहले दे माध्यम कन्नै महिला सशक्तिकरण दी दिशा च कम्म करा'रदी ऐ। इनें योजनाएं दे असर पर भरोसा जतांदे होई राष्ट्रपति मुर्मू होंरें आखेआ जे एहू पैहल राष्ट्री राजधानी दी महिलाएं च आत्मविश्वास जगाग ते उनेंगी अगगे बढने ते नमीं उंचाइं गी हासल करने आस्तै प्रेरित करोग।



UP-Holi

उत्तर प्रदेश च होलिका दहन दियां तैयारियां पूरे जोरें-शोरें कन्नै चला'रदियां ना। मुखमंत्री योगी आदित्यनाथ होंरें अपने होली दे शुभकामनां स्नेह च नागरिकें थमां शांति ते सद्भाव कन्नै होली मनाने दा आग्रह कीता ऐ ते उत्सव आस्तै मुकामी उत्पादें दे इस्तेमाल गी प्रोत्साहित कीता। मुखमंत्री होंरें एहू बी भरोसा दोआया जे सारे जिलें च सुरक्षा बवस्था मजबूत करी दित्ती गई ऐ ते लोकें सोयां प्रशासन दे कन्नै सहयोग करने दा आग्रह कीता। कल ग्रहण करी रंगें दा एहू त्यौहा बुधवारें गी होग। ग्रहण सरबंधी अनुष्ठानें तैहत राज्य दे मंदर कल बंद रौहडन्ना। होलिका पूजन आस्तै लोक दहन खेत्तर दी सफाई ते तैयारिएं च सक्रिय तौर पर हिस्सा लै'रदे ना।



Railways Holi Arrangements

डिविजनल रेलवे मैनेजर विवेक कुमार हुंदे निर्देशें पर रेलवे प्रशासन आसेआ औंदे होली दे त्यौहार गी दिखदे होई यात्रिएं ते सैलानिएं दी सहूलत लेई व्यापक बंदोबस्त कीते गेदे ना। यात्रिएं दी भारी भीड़

गी दिखदे होई जम्मू रेलवे डिविजन नै स्टेशनें पर सुरक्षा दे कन्नोकत्री नागरिक सहूलतें गी होर निग्गर बनाने दा फैसला कीता ऐ। सीनियर डिविजनल कमर्शियल मैनेजर उचित सिंघल होरें दस्सेआ जे जम्मू रेलवे डिविजन यात्रुएं दी सहूलतें गी बेहतर बनाने ते उंदे सफर गी आरामदायक बनाने लेई योजनाबद् तरीके कन्नै बक्ख-बक्ख गै पुट्टा'रदा ऐ। त्यौहारें दी रूतै दरान यात्रिएं दी बदधी भीड़ गी दिखदे होई बशेष रेल गड्डियां बी शुरू कीतिआं गेइयां ना।

<><><><><><>

PM –Netanyahu Talks

प्रधानमंत्री नरेन्द्र मोदी होरें कल इजरायल दे प्रधानमंत्री बेजेमिन नितिनयाहू हुंदे नै फोन पर गल्लबात कीती ते पच्छिम एशिया दे मजूदा हालात पर तफसीली चर्चा कीती। मोदी होरें इक सोशल मीडिया पोस्ट पर लिखेआ ऐ कि उ'नें नितिनयाहू होरें गी भारत दियें चिंताएं बारे अवगत कराया ते दस्सेआ जे नागरिकें दी सुरक्षा बारे ओ सबनें शा मते फिक्रमंद ना। प्रधानमंत्री होरें आखेआ कि भारत-मजूदा संघर्ष दे तौले शा तौले खत्म करने दे पक्खै च ऐ। तोंआई प्रधानमंत्री मोदी होरें संयुक्त अरब अमीरात दे राष्ट्रपति शेख मोहम्मद बिन ज़ायेद अल निहान हुंदे नै बी गल्लबात कीती ते UAE पर होए दे हमले दी सख्त निंदेआ कीती। उ'नें इनें हमले च होए दे जरूरी नुकसान पर दुख प्रगट करदे होई UAE कन्नै पूरी हमदर्दी प्रगट कीती।

<><><><><><>